



SIARAN MEDIA

ZAKAT PULAU PINANG MENJADI RAKAN STRATEGIK PROGRAM SOCIAL SYNERGY PERKESO UNTUK MANFAAT GOLONGAN YANG MEMERLUKAN

PULAU PINANG – Pertubuhan Keselamatan Sosial (PERKESO) meneruskan momentum pengukuhan perlindungan keselamatan sosial kepada Keluarga Malaysia menerusi **Program Social Synergy**, kali ini dengan **Zakat Pulau Pinang** sebagai rakan strategik.

PERKESO dan Zakat Pulau Pinang telah memeterai **Memorandum Kerjasama (MOC)** untuk melaksanakan pelbagai aktiviti bersama demi manfaat rakyat, semalam. MOC ini menempatkan Zakat Pulau Pinang sebagai salah satu daripada **150 agensi** di bawah gagasan Program Social Synergy.

Melalui MOC ini, PERKESO dan Zakat Pulau Pinang bakal bekerjasama dalam beberapa bidang seperti Program Social Synergy, perkongsian data, serta publisiti dan promosi program kesedaran bayaran zakat oleh anggota PERKESO. Aktiviti kolaborasi lain termasuk intervensi pasaran buruh dengan kerjasama Sistem Insurans Pekerjaan PERKESO, peruntukan Dana Wakalah untuk caruman Skim Keselamatan Sosial Pekerjaan Sendiri (SKSPS) kepada golongan asnaf yang menjalankan pekerjaan sendiri, serta aktiviti lain yang berkaitan dari semasa ke semasa.

Ketua Eksekutif PERKESO, Dato' Sri Dr. Mohammed Azman Dato' Aziz Mohammed berkata, "PERKESO amat berbesar hati atas kesudian Zakat Pulau Pinang menyediakan pembiayaan menerusi Dana Wakalah untuk menampung baki 20% bayaran caruman

SKSPS di bawah inisiatif SPS Padanan Caruman kepada usahawan asnaf di seluruh negara.”

Selain memperluaskan jaringan perlindungan sosial kepada usahawan asnaf serta golongan yang memerlukan, kerjasama antara kedua belah pihak ini juga bakal melahirkan **social security practitioners** di kalangan anggota-anggota daripada agensi terbabit. Pengetahuan dan kemahiran yang diperolehi daripada pelaksanaan aktiviti-aktiviti di bawah Program Social Synergy merangkumi aspek perlindungan sosial dan pekerjaan, kebajikan, pekerjaan, kewangan, perniagaan dan sebagainya.

Sejak tahun 2019 sehingga pertengahan tahun 2022, Program Social Synergy telah berjaya melaksanakan **lebih 15,000 penyaluran kes** kepada agensi-agensi berkaitan melalui **Sistem MySynergy**. Portal MySynergy ini dibangunkan secara dalaman (*in-house*) oleh PERKESO dan ia merupakan sebuah platform keselamatan sosial yang pertama di Malaysia. Portal ini juga mempunyai keupayaan menjana pelan kecenderungan individu, menjejak kes prospek, menyokong interaksi antara koordinator dari semua agensi, pelaporan analitik and sebagai pangkalan pengetahuan agensi.

Sementara itu, selain daripada berperanan sebagai agensi yang mengendalikan urusan zakat, Zakat Pulau Pinang juga bertanggungjawab dalam pembangunan sumber manusia, pembangunan usahawan dalam kalangan asnaf dan golongan rentan serta pelajar kurang berkemampuan. Sehubungan itu, sinergi daripada kerjasama strategik antara Zakat Pulau Pinang dan PERKESO mampu menjana manfaat besar kepada golongan sasaran, seterusnya meningkatkan kesejahteraan rakyat Malaysia demi pembangunan negara yang inklusif dan menyeluruh.

**Dikeluarkan oleh:
Bahagian Komunikasi dan Hal Ehwal Korporat
12 November 2022**

Untuk sebarang pertanyaan, sila hubungi Hamisah Hamid di talian +6019 – 3833 605.